

## ტრაგედია უგმირით

შეუგნებლად დაერიდა ბავშვების სივილს --- გამოვიდა ქოხიდან...  
გადიარა ეზო... უგზო-უკვლოთ მიდიოდა. სადღაც ყანაში ჩამოჯდა  
ქვაზე. ერთი ფიქრიც არ ჩნდებოდა თავში... ცალ-ცალკე სიტყვები  
გაიელვებდნენ ნაპერწკალივით: "ჭადი" ... "ბავშვები" ... "ხარი" ...  
ისევ ადგა, ჯერ შარავზას გაყვა, მერე ორღობეში შეუხვია: დაუძა-  
ხა ვილამაც. მობრუნდა.

-- გუშინწინ რომ მთხოვე ფქვილი, ღმერთია მოწამე, არ მქონ-  
და; აი დღეს ქე მაქ ცოტა, და ნახევარ ჯამს გიზიარებ... ოღონდ  
არ დამღუპო -- იმ პარასკევს უნდა დამიბრუნო.

-- მომეცი! -- მოკლეთ მოუჭრა და ღობეს მიადგა.

-- ამ ტოპსიკას ნუ გამომიგზავნი. მე თვითონ წამოვიღებ...

ადგილიდან არ იძროდა და ხმასაც არ იღებდა.

-- რა დაგემართა. კაცო?

-- არაფერი!

-- ნუ გეშინია, ღმერთი მოწყალეა, ჩვენკენაც მოიხედავს...

ნელა შემობრუნდა, უხმოთ მოშორდა მოხუც დედაკაცს--- თა-  
ვის ნათლიას, რომელიც გულში ფიქრობდა: შენი მტერია, ეს ნახე-  
ვარი ჯამი ფქვილი კი დავკარგე... მარა ჩემი რძალი მაინც არ გაი-  
გებდეს.... რას უშველის, საწყალს, ნახევარი ჯამი?.. ეხ. ღმერთო,  
ღმერთო!

-- მამა, ფქვილი მოიტანე? --- ახრიალდნენ ბავშვები.

-- გვაჭმევ?

-- კი, შვილო, კი, ბიჭო, --- ეუბნებოდა ხან ერთსა და ხან მე-  
ორეს.

ბავშვებს უთქმელათ მოჰქონდათ ფიჩხი, ანთებდნენ ცეცხლს,  
აწყობდნენ და ასწორებდნენ კეცებს.

მამამ წუთში მოზილა ცომი და გავარვარებულ კეცებს დააკრა.  
ბავშვების მოუთმენლობამ მოაგონა, რომ კარგი იქნებოდა ჭადების  
გამოცხობამდი მათი თავიდან მოშორება.

-- აბა, ბიჭებო, წადით და ბიცოლა ეფროსინეს ოხრახუში გა-  
მოართვით -- ბევრი აქვს, მოგცემთ...

ბავშვები გაიქცნენ.

ჭადის სუნმა მამაც აიტაცა. კეციდან ჭადი აიღო, გატეხა, გასაგ-  
რილებლად დაბერა და "გასასინჯათ" ლუკმა პირში ჩაიდვა. მთელ  
სხეულს განუზომელი მადა აღეძრა...

მეორე ლუკმა...

სწვავდა ენას და მაინც სჭამდა.

ბავშვები შემოვარდნენ.

-- მომეცი, მამა!..

-- მეც!..

-- გადით, თქვე გასაწყვეტლებო!

-- მამა, მამა!..

-- მამა, ერთი ლუკმა!

ბავშვები ცალი ხელით მილახა და ლაფაროში გაყარა; იქედანაც

თვალზე ცრემლშემხმარი ბავშვები ძაღლებივით კნაოდენ და იძახდენ:

- მამა, გვაჭამე!

ყურადღებას არ აქცევდა. მერე ერთიანათ ჩაიმუჭა პირში ბავშვის მიერ მოტანილი ოხრაბუში და წავიდა... გადავიდა ტევრში... მიწვა... კარგა ხანს ისვენებდა გარეტიანებული, თვალგახილული, მთვლემარი.

წამოიწია, დაჯდა.

ბავშვების სივილი მოაგონდა...

მე შევჭამე....

ბავშვებს არაფერი ვაჭამე...

ღმერთო, რა მომივიდა?..

სირცხვილი!.. ხალხს რაღა უთხრა?! ვაი თუ დაიხოცენ...

ადგა, მივიდა ბავშვებთან...

გადაბელილი ბჟოლის ძირში მიგდებულიყვნ... ეძინათ... მამა მიუწვა. ცრემლი შეჩერებოდა წამწამზე. თავს იკავებდა: არ ვალვიძო მაინც! რა ვქენი! დედა ხომ არ იზამდა!!

უმცროსს გამოეღვიძა. გაუკვირდა, ჩააჩერდა მამას.

-- მამა!.. -- წყნარათ დაიწყო ბავშმა.

-- რა, შვილო? -- ნაზათ უპასუხა.

-- მთლად შეჭამე?

-- !!

-- მამა, ცოტა იქნება დაგრჩა ---მომეცი... მუცელი მტკივა, არ გაგამხელ...

მამას ზღუქუნნი წასკდა.

პატარა ბავშსაც გაეღვიძა "მშია"- "მშიას" ძახილით.

მამა წამოიჭრა, ეზო გადირბინა. ვენახში მოხვდა. გაბმული ცხვარი სძოვდა. ახსნა. გავიდა ხეზე. დაჯდა. ბაწარი ტოტს მაგრათ მიაგა, მარყუეი გამოსკვნა მეორე ბოლოში, გაშინჯა -- კისერზე თუ მომიჭერსო და...

კეთილი ბებერი ნათლია იფოფრებოდა. - ღმერთო! ღმერთო რა დროს მომასწარი!.. რა საცოდაობა დატრიალდა... ვინ მოუვლის დამშეულ ობლებს?!

-- რაღა ჩემს ვენახში, ჩემი კარის უკან, ჩემი ბაწრით ჩამოიხჩო თავი ამ ოჯახქორმა! --- ბრაზობდა და იწყევლებოდა მეზობელი, რომელსაც ამ შემთხვევის გამო, ვინ იცის, რა მოელოდა...

1922 წ.